



# Na suđenju dilerima preslušavani presretnuti razgovori

## Kupovali 'gumu', 'lice', 'vunu', 'lifu', 'glavu'...

Valentina Sulić drogu kupovala od Almira Denje, koji ju je nabavljao od Adisa Burića. Preprodavači drogu dobijali nakon što bi donijeli novac od prethodne isporuke

**U** nastavku suđenja grupi Adisa Burića, uhapšenoj u akciji Osoje, koja je optužena za organizirani kriminal i neovlašteni promet opojnih droga, preslušavani su presretnuti telefonski razgovori koje su vodili članovi ove grupe Almir Denjo i Valentina Sulić sa nekoliko osoba.

### Zadnja u lancu

Tokom posebnih istražnih radnji, istražitelji **SIPA-e** su došli do informacija da je Valentina Sulić bila zadnji diler u lancu i bavila se uličnom prodajom droge. Ona je, prema tim saznanjima, imala oko 80 konzumenata na području Mostara, Čapljine, Širokog Brijega, Čitluka, kao i nekoliko osoba iz Hrvatske. Drogu je nabavljala od Almira Denje, zvanog Kefa, koji je drogu uzimao od vode ove grupe Adisa Burića. On je, inače, nakon sporazuma o priznanju krivnje, već osuđen na pet i po godina zatvora. Kako je pojasnio istražitelj **SIPA-e** Semir Šarić, koji je u sudnici puštao snimke presretnutih razgovora, Burić, Denjo, Josip Čužić i drugi za drogu su koristili razne šifre, kao što su "lice", "glava", "guma", "vuna", "lifa" i slično.

Istražitelj Šarić je pojasnio da su preprodavači dolazili bez novca, dobijali drogu, a novu isporuku bi ponovo dobili tek kad bi došli sa novcem od prethodne isporuke. Prateći Denju, koji je bio označen kao meta Osoje 13-1, 9. maja 2013. komunicirao je sa

Matom Marinovićem koji je od njega zatražio da mu "više spakuje, jer je dobar". Šarić je pojasnio da je tokom komunikacije između Denje i Mate Marinovića uočeno da Mate od Denje naručuje kokain za 200 KM.

Valentina Sulić, je 12. maja 2013. u večernjim satima sa broja Josipa Čužića zvala Denju da preuzme drogu. Meta je bio Čužićev telefon označen kao Osoje 12-1.

Naredni dan pričali su Čužić i Denjo, koji je od Josipa tražio da mu donese novac kako bi i sam išao u nabavku droge. Čužić ga je pitao koliko je skupio i dali "ima gume".

U narednim razgovorima dalo se zaključiti da je jedan od njih vagao drogu i da je količinski manja. Potom su 13. maja ponovo pričali Marinović i Denjo, koji mu je trebao isporučiti drogu. Narednog dana Sulićeva je ponovo zvala Denju i tražila novu količinu droge.

### Roba iste kvalitete

Denjo i Adis Burić pričali su 15. maja te ga je Burić pitao koliko je sakupio vune. Ovaj put istražitelji su pratili Burića, koji je označen kao Osoje 13-3. Denjo je rekao da ima 1.500 maraka, te još 200 na konto duga. U narednim razgovorima Burić je požurivao Denju da mu isplati novac. Nakon što je sakupio novac, Denjo pritišće Valentinu Sulić, kojoj u razgovoru od 3. juna 2013. traži da mu do večeri donese novac. Potom Denjo ponovo kontaktira Burića od kojeg traži da roba bude iste kvalitete.

M. M.

### "PALI" U AKCIJI OSOJE

## Švercovali heroin i kokain

Ova grupa je uhapšena 20. septembra 2013. u akciji Osoje. U optužnici se navodi da je Adis Burić organizovao i rukovodio ovom grupom, a ostali su postali članovi te grupe, te su od aprila do septembra 2013, djelujući kao grupa za organizovani kriminal, vršili neovlašteni međunarodni promet heroina i kokaina, i to na području BiH i iz BiH u Hrvatsku.



**Sa privodenja uhapšenih u akciji Osoje**